

**PORT VILA
VANUATU GOVERNMENT**

The Constitution Building, Lini Highway, PMB 9012 Port Vila
All general enquiries contact Tel: 67824573 Fax: 678 24574

Email: vatqueries@vanuatu.gov.vu

Web: <http://customsinlandrevenue.gov.vu>



VAT, Olgeta klab, jariti mo non-profit bodi



Olgeta seksen insaed long buklet ia

Peij

A	Festok	3
----------	---------------	---

B	Valiu Aded Takis	3
	Wanem nao hemi Valiu Aded Takis?	3
	Olsem wanem VAT i wok	4

C	Rejista long saed blong VAT	5
	Wokemaot wanem nao hemi ol 'takisebol' sel	5
	Olgeta eksempten	5
	Sero-reiting	5
	Hu nao i mas rejista?	6
	Olgeta oganaeseisen we anuol sel blong olgeta ino kasem long 4 milian Vatu	6
	Olgeta ritin period	7
	Olgeta defren wei blong pruvum VAT	8

D	Wokemaot VAT long ol revenu / sel / inkam	8
----------	--	---

E	Olgeta defren rod we revenu / sel / inkam i kamaot long hem	9
	Olgeta doneisen	9
	Olgeta guds mo sevis we oli doneitem	9
	Olgeta stol long maket	9
	Olgeta guds mo sevis we wan oganaeseisen i givimaot wetem wan smol fi	9
	Olgeta fi we jyoj i stap jasem	9
	Olgeta sponsa we oganaeseisen i risivim	9
	Olgeta inkam we i kamaot long investmen	9
	Olgeta grant we i kam long Gavman	9
	Akomodeisen	10
	Olgeta rafol, bingo mo praes kompetisen	10
	Anuol sabskripsen	10

F	Olgeta ekwipmen mo rikod	10
	Olgeta kas rejista	10
	Olgeta rikod blong pruvum VAT	11
	Olgeta takis invois	11

G	Inkam kategori tebol	12
	Blong moa infomeisen o help	12

A Festok

Buklet ia i kamaot festaem long manis Mei 1998 mo oli rivium o mekem sam jenis long hem bakegen long Oktoba 2005. Eni jenis we i tekem ples afta long det ia bae ino stap insaed long buklet ia.

Plante pipol oli bin stap askem se from wanem nao VAT i mas aplae long ol jaritebol oganaeseisen, ol non-profit bodi, ol klab mo ol asosieisen. Oli talem se hemi no fea from se ol kaen bodi mo oganaeseisen olsem ia oli stap provaedem ol gudfala sevis long ol komuniti blong yumi mo oltaem oli no stap blong mekem profit. Be blong mekem se takis ia i fea long evriwan, hemi impoten festaem blong lukluk gud long ol prinsipol we VAT hemi stanap long hem.

Stamba tingting blong buklet ia hemi blong eksplenem olsem wanem bambae VAT i afektem yu mo blong givimaot ol spesel infomeisen blong helpem olgeta memba mo administrita blong ol kaen oganaeseisen ia blong oli andastandem VAT.

Blong save moa infomeisen long saed blong registreisen mo olsem wanem blong pruvum VAT,

yu save toktok wetem olgeta ofisa insaed long VAT Ofis.

Wanem ia wan non-profit bodi?

Long saed blong VAT, wan non-profit bodi hemi wan sosaeiti, asosieisen o oganaeseisen (nating sipos oli inkopereitem o no) we i stap mekem ol aktiviti be i **NO** blong winim profit blong eni memba blong hem, mo ol rul blong hem i stopem blong oli seremaot mane o eni narafala propeti i go long ol memba blong hem.

Plante long olgeta jaritebol oganaeseisen, spots klab, sevis oganaeseisen, profesonal grup, jioj, sosol klab, mo skul komiti oli olsem olgeta non-profit bodi.

Wanem ia wan jariti?

Wan jariti hemi wan oganaeseisen we oli setemap blong seremaot ol help i go long ol pua pipol, blong helpem pipol i gat moa save o blong help long saed blong rilijen o blong mekem ol narafala aktiviti we bambae i helpem wan komuniti.

B Valiu Aded Takis

Valiu Aded Takis - Wanem ia?

VAT hemi wan takis we i aplae long ol mane we yumi spendem. Wanwan man mo woman i gat fasin blong hemwan long olsem wanem bambae i spendem mane blong hem. Samfala oli stap spendem plante mane long ol samting blong kakae be ol narawan oli stap spendem long saed blong spot, jyoj o ating long ol samting blong wan jaritebol o non-profit oganaeseisen. Tingting bihaen long VAT hemi blong mekem sua se eni kaen konsuma spending i gat takis long hem long wei we hemi fea mo i stret. Be i no blong talem se wan spending hemi gud moa bitim narawan folem moral o sosol laef. Tingting bihaen long takis rifom blong Gavman hemi blong mekem sua se Gavman i kolektem mane long wan fasin we i moa gud mo i moa fea. Bambae ekspendija program

blong Gavman nao i soem olsem wanem bambae oli distributem ol fand ia long hem.

VAT hemi no wan takis we ol man we oli prodium o saplaem ol guds mo sevis oli mas pem. Olgeta oli stap nomo blong kolektem takis ia long bihav blong Gavman. VAT bambae i no sapotem sam saplaea be long narasaed hemi go agensem ol narafala saplaea, hemia nomata wanem tingting nao oli gat taem oli saplaem o prodium ol guds mo sevis ia. Hemi **no** wan takis long ol profit mekem se hamas profit yu stap mekem hemi no matta.

DKIR bambae i kolektem VAT long wan reit nomo (hemia 12.5%) long kolosap evri gud mo sevis we oli salem long prodaksen mo distribusen jen. Be long saed blong olgeta we oli stap prodium, distributim mo salem olgeta guds mo

sevis, bambae oli save kleim bak VAT we oli spendem long olgeta ekspenses o pejes blong bisnis blong olgeta.

Hemia i minim se las man nomo long laen we hemi pem guds o sevis be hemi no salem bak o hemi no prosesem bakegen bambae hemi pem takis ia mo hemi no save kleim bak VAT.

Hemi plan blong Gavman blong putum aot wan sistem blong Takis we i wok gud, i moa stret mo i moa fea mo tu Gavman i wantem wan takis sistem we ol ifekt blong hem oli semak long evriwan wan konsumna. Hemi no stret blong yusum sistem blong takis blong ranem ol wok blong sendem ol help i go long ol pipol we oli nidim help. Eni help we pipol i nidim i mas pas tru long ol Gavman dipatmen mo janel we oli setemap blong mekem ol wok ia.

Olsem wanem VAT i wok

Hemi tru blong talem se i gat tu wei we VAT i stap wok long hem :

- Wan man or wan organaeseisen we i rejista, olsem wan klab, i mas pem 12.5% takis long evri guds mo sevis we hemi pem blong yusum long klab. Be hemi save kleim bak VAT ia olsem wan kredit, **hemia i mekem se long end klab i no pem wan VAT nating.**
- Klab i addemap 12.5% VAT long praes blong evri guds mo sevis we hemi salem, mo afta hemi pem amaon ia, we hemi VAT long ol sel/inkam we hemi aotput takis (maenas (-) VAT long ol ekspenses we hemi input takis) i go long VAT Ofis - **hemia i minim se klab i jajem VAT long olgeta man we i pem or resivim guds o sevis.**

Eksampol: Wan futbol klab we i gat 10 tim insaed hemi rejista long saed blong VAT. Klab ia hemi pem ol unifom blong ol tim blong hem ia long wan spots stoa mo kost blong hem i kasem 100,000 Vatu plas 12.5% VAT we hemi 12,500 Vatu. 12,500 Vatu ia hemi VAT we klab i mas pem folem ol pejes blong hem. Hemia i minim se faenal praes we klab i mas pem i go long spots stoa ia hemi 112,500 Vatu. Long semtaem klab hemi stap jasem ol 300 memba blong pem wan anuol fi blong 1,000 Vatu plas 12.5% VAT, we i mekem se faenal fi we wanwan memba i mas pem hemi 1,125 Vatu. Taem evri memba ia oli pem ol anuol fi blong olgeta, bambae klab hemi risivim wan total blong 337.500 Vatu, we insaed i gat 37,500 Vatu olsem

VAT. Long 37,500 Vatu we klab hemi winim long ol sel/inkam blong hem, hemi tekemaot 12,500 Vatu we hemi spendem long ol pejes blong hem long spots stoa. Nao ia bambae hemi sendem balens blong hem nomo we hemi 25,000 Vatu i go long VAT Ofis.

Folem nomol fasin blong wok, bambae klab hemi gat ol samting tu we hemi pem mo saplaea i bin jasem VAT long hem. I save gat ol samting olsem ol travel kost, ekwipmen, postej, rent blong klab rum mo samfala samting moa. Semak olsem VAT we klab i bin pem long saed blong unifom, bambae klab hemi didaktem total amaon blong VAT we hemi spendem long ol pejes ia long VAT we hemi kolektem long ol anuol fi blong ol memba, hemia taem hemi stap wokemaot hamas VAT nao hemi mas pem i go long VAT Ofis.

Tresera blong klab bambae hemi ademap evri VAT we klab i pem long saed blong pejes mo aot long total ia bambae hemi didaktem total VAT we klab i bin jasem mo kolektem long saed blong ol anuol fi, rentem ol fasiliti, ol sel, ol spona we klab i kasem wetem ol narafala inkam mo sel bakegen. Difrens we i stap hemi amaon we klab i mas pem i go long VAT Ofis, o rifand we klab i mas kasem. Taem klab hemi pem ol niu ekwipmen o hemi mekem plante wok blong meintenem ol fasiliti blong hem, hemi save askem blong Gavman i rifandem ol mane we hemi bin spendem long VAT.

Klab hemi no nid blong wet kasem taem we ol memba oli pem olgeta anuol fi blong olgeta bifo hemi kleim from wan didaksem from VAT we hemi pem long unifom. Klab hemi save didaktem evri VAT long ol pejes long period we ol pejes ia oli tekemples long hem.

Hemi semak long spots stoa we i risivim 12,500 Vatu taem hemi salem ol unifom from bambae hemi mas didaktem long amaon ia VAT we hemi bin spendem long ol pejes blong hem, hemia i minim VAT we hemi spendem long ol samting we bambae hemi yusum long bisnis, bifo hemi sendem balens i kam long VAT Ofis.

Hemi tru se evri VAT i pas tru long jen blong salem mo pem ol guds mo sevis mekem se las man we i yusum guds mo sevis nao, we long ples ia hemi ol memba we oli pem anuol fi, i mas pem takis ia mo bambae oli no save mekem eni kleim blong kredit. Semak olsem ol narafala praevet konsumna, olgeta pipol we oli ranem ol wok blong

klab bambae oli mas pem VAT long ol pejes we bambae oli yusum long praevet yus.

C Rejista long saed blong VAT

Wokemaot wanem nao hemi ‘takisebol’ sel

Blong faenemaot sipos oli mas rejista long saed blong VAT o no, fastaem olgeta klab, non profit bodi, komuniti oganaeseisen mo profesional asosiesen oli mas wokemaot wanem kaen sel nao oli stap mekem. Hemia i minim se oli mas faenemaot sipos oli mas jasem VAT long ol sel blong olgeta o no. Plante long olgeta oganaeseisen ia oli stap mekem ol ‘takisebol’ sel, we i minim se taem oli stap provaedem ol guds mo sevis long ol klab memba o memba blong komuniti, oli stap askem sam kaen fi, sabskripsen o jajes.

Long saed blong olgeta volonteri oganaeseisen mo klab, taem yumi tokabaot ol takisebol saplae, yumi stap minim ol samting we oli kasem long wan sponza, ol grant we Gavman i givim, ol sel long ba, niuspepa sabskripsen, membasip fi, mane blong ol rafol, mane we oli winim long ol sosol, spots o narafala ivent, ol fi we oli jasem ol turis o tua grup, mane we oli winim long rent blong ol fasiliti, sel blong ol guds olsem ol handikraft, suvenia, emblem, t-shet mo plante narafala samting moa. Seksen E blong buklet ia i eksplenem moa sam wei we bambae VAT i afektem sam long ol aktiviti ia.

Sipos kaen sel olsem ia i tekemples long taem blong wan aktiviti we i stap gohed oltaem, bambae yumi save talem se oganaeseisen ia hemi mekem wan ‘takisebol’ aktiviti. **Olgeta hobi, praevet arensmen blong mekem wan rikriesen aktiviti mo fasin blong holem wok olsem wan wokman oli no ol takisebol aktiviti.**

Olgeta eksempten

I gat sam kaen sel we oli eksempt long VAT. Hemia i minim se oli no pem VAT long olgeta, mo taem oganaeseisen i stap wokemaot valiu blong ol takisebol sel blong hem blong faenemaot sipos hemi nid blong rejista o no, hemi no mas kaentem ol kaen sel olsem ia. Sipos wan sel hemi eksempt bambae i no gat VAT long hem mekem se VAT we bisnis hemi pem long ol input long saed blong olgeta eksempt sel ia bambae hemi no save kleim from wan kredit long olgeta.

Hemia nao sam long olgeta guds mo sevis we oli eksempt long VAT:

- Olgeta guds mo sevis we oli doneitem mo afta wan non-profit bodi hemi salem bakegen; mo
- Olgeta faenansol sevis; hemia i minim wok blong eksjensem mane o karensi blong givimaot ol jek, postol not, intres peimen, givim olgeta kredit, laef insurens, kontrak mo ritaemen skim, anda raeting brokarej mo wok blong arenjem sam long olgeta samting ia, eksampol, arenjem olgeta mojej;
- Olgeta rent blong ol haos we pipol i silip long hem;
- Olgeta edukeisonal institusen;

Insaed long seksen E i gat moa toktok abaot ol defren kaen eksempt sel we bambae ol klab oli save fesem.

Hemi impoten blong luksave se wan oganaeseisen we hemi stap dil nomo wetem olgeta eksempt aktiviti hemi no gat eni spesel advantej. Oganaeseisen ia bambae yumi tekem se hemi olsem wan faenal konsuma, we i minim se hemi mas pem ful kost blong VAT long evri pejes blong hem.

Sero-reiting

Nomata we VAT bambae hemi aplae long kolosap evri sel long wan reit blong 12.5%, i gat sam transaksen we bambae oli sero-reited. Hemia i minim se bambae hemi jasem VAT long wan reit blong sero pesen, we i minim se i no gat VAT nating hemi jasem long wan sel, be input VAT we hemi i pem long olgeta kost blong olgeta transaksen ia bambae hemi save kleim bak wan kredit long hem.

Wan kategori we bambae yumi luk plante se hemi sero-reited hemi ol guds we oli eksptem. Plante long ol klab mo volontari oganaeseisen bambae oli no involv long ol sero-reited aktiviti.

Be i gat sam **profesonal asosieisen** we oli gat ol ovasi memba we bambae oli nid blong provaedem ol guds mo sevis long olgeta. Sipos oganaeseisen

ia i salem ol guds i go long wan ovasi memba blong hem, bambae ol guds ia oli sero-reited we i minim se bambae oganaeseisen ia i no save jajem VAT long hem sipos memba ia i no stap liv long Vanuatu long taem we oli mekem saplae.

Hu nao i mas rejista?

Evri wanwan man, bisnis mo oganaeseisen we oli stap karemaot wan takisebol aktiviti mo ol sel blong olgeta samting we i gat takis long hem i moa long 4 milian Vatu long wan yia oli mas rejista wetem VAT Ofis mo kam wan “rejisted man”. Olgeta non-profit oganaeseisen (kavremap ol jariti oganaeseisen tu) oli kat spesel wei blong rejista sipos oli wantem.

Wan non-profit oganaeseisen bai i save raetem wan aplikesen leta i go long VAT Ofis blong luk luk long wan wan long ol branis or divisen blong oganaeseisen ya be i no hol wan wantaem. Olgeta wan wan branis ya we oli kat wan tenova we i bitim 4 milian long wan yia oli mas rejista. Olgeta we tenova blong olgeta i anda 4 milian long wan yia oli save rejista sipos oli wantem.

Olgeta wan wan branis o divisen oli mas kipim gud ol rikod blong akaonting blong olgeta. Ol branis oli mas stap long ol difdifren ples blong olgeta mo oli mas stap kohed long ol wan wan aktiviti blong olgeta.

Olgeta oganaeseisen we anuol sel blong olgeta i no kasem 4 milian Vatu

Eni smol oganaeseisen we sel blong hem i anda long 4 milian Vatu long wan yia hemi save disaed blong no mas rejista wetem VAT Ofis mo bambae hemi no nid blong hemi kolektem VAT. Olgeta oganaeseisen we oli no rejista bambae yumi tritim olgeta olsem ol last konsuma. Bambae i nid blong olgeta smol oganaeseisen we oli stap long kaen situeisen olsem ia blong oli jekem gud ful opereisen blong olgeta mo hamas ekspendija mo inkam nao oli luk se bambae oganaeseisen hemi gat long ful yia, mo bambae oli mas rimemba gud olgeta samting ia:

- Sipos oli rejista long VAT o no, olgeta oganaeseisen ia oli mas pem VAT long olgeta pejes mo ekspenses blong olgeta be i no long saed blong salari mo weijes. Sipos

olgeta oganaeseisen ia oli rejista, bambae oli save kleim from VAT we oli spendem long ol pejes mo ekspenses blong olgeta; be sipos oli no rejista, bambae oli mas akseptem ol narafala kost we i kam insaed long ol opereisen blong olgeta;

- Bambae olgeta smol klab mo oganaeseisen oli nid blong skelem gud kost blong ekstra wok long saed blong administreisen we i kavremap ol wok blong kipim ol rikod mo blong fulmap olgeta VAT riten komperem wetem eni gud saed we bambae klab o oganaeseisen i benefit long hem sipos hemi rejista long saed blong VAT;
- Wan oganaeseisen we i stap mekem plan blong spendem wan bigfala mane o long fiuja bambae hemi bildim wan haos o developem wan program, bambae hemi stap pem bigfala mane long saed blong VAT mo bambae hemi moa gud sipos hemi lukluk long saed blong rejista blong mekem se hemi save kleim from olgeta VAT ia we hemi pemaot long ol ekspenses blong hem;
- Sipos wan oganaeseisen hemi stap mekem bigfala pat blong ol sel mo inkam blong hem i go long ol narafala pipol o bodi we oli rejista long saed blong VAT, bambae hemi moa gud sipos oganaeseisen ia hemi rejista tu long saed blong VAT;
- Sipos hemi rejista, oganaeseisen bambae hemi mas kolektem 12.5% blong VAT long evri sabskripsen mo ol narafala fi we hemi jasem, mo hemi mas pemaot mane ia (didaktem VAT long olgeta pejes) i go long VAT Ofis. Sipos hemi no rejista, ating bambae oganaeseisen hemi mas leftemap ol sabskripsen mo ol narafala fi blong hem blong mekem se hemi save mitim olgeta kost blong ol pejes we hemi go antap bigwan. Sipos hemi rejista long saed blong VAT o no, ful ifekt blong VAT long olgeta faenansol posisen blong olgeta smolmol klab mo oganaeseisen ia kolosap bambae i semak nomo, be hemia nomo sipos hemi spendem bigfala pat blong revenu blong hem long ol salari mo wejes;
- Sipos salari mo wejes hemi wan samting we hemi spend plante long hem, hemi moa gud sipos oganaeseisen ia hemi no rejista.

Eksampol we i stap daon i soem wan klia
pikja long tinting ia.

VAT, ol klab, jariti mo non-profit bodi

Eksampol:

Asosiesen blong ol man blong mekem ol kaving ol sel mo pejes blong asosiesen ia long wan yia i go olsem:

	VT
Olgeta sel	
Olgeta sabskripsen	1,200,000
Olgeta fi blong tij	500,000
Olgeta sel blong tul blong kaving	50,000
Olgeta sel blong kofi	2,000
Olgeta sel long doa blong eksebisen rum	100,000
	VT 1,852,000
Olgeta pejes / ekspenses	
Mane we hemi spendem blong pem ol ekwipmen mo material	200,000
Mane we hemi spendem long klining mo material	20,000
Mane we hemi spendem long ol fi blong odit	30,000
Mane we hemi spendem long postej	9,000
Mane we hemi spendem long telefon	35,000
Mane we hemi spendem long kakae mo drink	15,000
Mane we hemi spendem long fuel mo oel	5,000
Mane we hemi spendem long insurens	12,000
Mane we hemi spendem long printing mo steisenari	200,000
Mane we hemi spendem long rent	200,000
Mane we hemi spendem long ripea mo meintenens	80,000
Mane we hemi spendem long elektrisiti	30,000
Mane we hemi spendem long salari mo wejes	1,000,000
	VT 1,836,000

Sipos asosiesen ia hemi no rejista

Bambae asosiesen blong ol man blong mekem kaving, hemi pem VAT long ol pejes/ekspenses we i stap long lis ia be i no salari mo wejes. Hemia i minim se bae hemi pem VT 104,500 long VAT (12.5% blong VT 1,836,000 mo tekemaot VT 1,000,000), be bae hemi no save kleim bak mani ia.

Sipos asosiesen ia hemi rejista

VAT we i stap long eni praes we asosiesen i jajem i ko long ol narafala man we oli rejista, ol man ia oli save kleim wan kredit olsem wan VAT we oli pem long wan pejes.

Asosiesen ia bambae hemi pem VAT long olgeta pejes blong hem be ino salari mo wejes be hemi save kleim bak wan kredit long VAT ia, we hemi (VT 104,500)

Asosiesen ia i mas pruvum olgeta VAT we hemi kolektem long ol sels blong hem mo pem i kam long VAT Ofis, hemi mas leftemap inkam o ol praes blong hem long 12.5% blong kavremap VAT ia we hemi bin pem (emia VT 231,500 o 12.5% blong VT 1,852,000).

Samari

Asosiesen ia i save jus blong no rejista from tenova blong hem hemi anda long 4 milian. Long lukluk we i stap bigfala pat long ol pejes blong hem nao emi ol salari mo wejes mo bambae hemi gud moa blong hemi no rejista. Sipos i nogat salari mo wejes, bambae hemi stil gud yet blong hemi no rejista. Hemi save rejista sipos bigfala pat blong sels blong hem i go long ol narafala man we i rejista.

Olgeta riten period

Eniwan we i rejista long saed blong VAT bambae hemi gat wan riten period blong wan manis o tri manis. Sipos tenova blong olgeta hemi ova o oli ting se bae hemi ova long 8 milian long wan yia, oli mas fulumap mo sendem ol riten blong olgeta i kam evri manis long VAT Ofis. Be sipos tenova blong olgeta i no go kasem amaon ia, olgeta i save jusum sipos oli wantem sendem olgeta riten blong olgeta i kam evri manis o evri tri manis.

Olgeta difren wei blong pruvum VAT

Eniwan i save pruvum VAT long wan long tufala wei ia , hemia i gat **invois beises o peimen beises**:

- **Invois beises**

Long wei ia yu mas pruvum VAT folem olgeta sel mo pejes we i gat invois long hem.

Olgeta oganaeseisen bambae oli mas pruvum takis we oli pem long ol pejes mo sel blong olgeta mo taem we invois o peimen i

tekemples long hem, hemia i dipen long weswan nao i kam fastaem. Oganeseisen hemi save kleim from wan kredit long saed blong ol VAT long **olgeta pejes** stret afta we hemi kasem wan invois we i go wetem ol pejes nomata sipos hemi no mekem peimen blong ol pejes ia yet. Hemi semak tu long VAT we i kamaot long saed blong **olgeta sel / inkam** taem we oganaeseisen hemi kasem wan invois (eksampol wan sabskripsen notis) o taem hemi kasem peimen. Hemia i minim se nomata sipos oganaeseisen i no kasem peimen yet, bambae hemi mas pemaot takis ia folem invois we hemi gat i stap.

- **Peimen beises**

Folem wei ia oganaeseisen hemi mas pruvum VAT taem we hemi mekem o risivim peimen. Wei ia bambae hemi luksave nomo olgeta bil we oganaeseisen hemi bin pem mo olgeta inkam we oganaeseisen hemi risivim. Be hemi impoten yet blong i mas gat wan takis invois blong sapotem eni kleim we i bitim 5,000 VT.

D Olsem wanem blong wokemaot VAT long ol sel mo inkam

Folem loa, olgeta oganaeseisen we oli rejista long saed blong VAT oli mas kolektem VAT long evri takisebol sel o sos blong revenu blong olgeta olsem we Seksen C blong buklet ia we taetol blong hem hemi (*Rejista long saed blong VAT*) i tokbaot. Hemia i minim se bambae oli mas pemaot 1/9 blong valiu blong olgeta sel ia we i gat VAT insaed finis i go long VAT Ofis. Hemia nao fasin we yumi folem blong yumi kasem figa blong 1/9:

Eksampol: Sipos i gat wan klab we sabskripsen kost blong hem hemi 10,000 VT, VAT bambae hemi 12.5% we hemi semak long 1,250 VT mo bambae i mekem se faenol

praes blong sabskripsen kost we i gat VAT insaed hemi 11,250 VT. 1/9 blong praes ia we i gat takis insaed finis hemi olsem VAT. Wan isi wei blong faenemaot hamas takis i stap insaed long eni praes we i gat takis long hem finis hemi blong divaedem praes ia i go long 9.

Long fasin blong wok, olgeta klab mo narafala oganaeseisen bakegen we oli rejista long saed blong VAT bambae oli nid blong adjustem olgeta sabskripsen, fi, grant mo eni narafala samting bakegen blong mekem sua nomo se oli kasem oltaem sem praes blong olgeta guds mo sevis we oli stap salem, **plas** VAT.

***E* Olgeta stret ples we reveniu mo sel i kamaot long hem**

Olgeta doneisen

Olgeta doneisen blong mane olsem presen blong mane i no gat VAT long hem. Wan doneisen hemi no semak long wan grant from se i no gat eni kondisen long hem mo from se oli givim be oli no askem eni guds, sevis o raet, eksampol, raet blong kam memba blong oganaeseisen. Doneisen hemi kavremap tu eni samting we man hemi promis blong i givim long klab o oganaeseisen afta we hemi ded mo olgeta kash praes we oli doneitem.

Olgeta guds mo sevis we oli doneitem

Olgeta guds mo sevis we oli doneitem mo wan non-profit bodi hemi salem bambae oli eksempt long VAT. Eksampol, mane we oli winim long sel we oli mekem long wan trak o long wan kek stol oli eksempt long VAT sipos olgeta guds we oli salem ia oli bin doneitem long olgeta. Hemi semak tu long eni mane we wan klab hemi reisemap mo takis i no kavremap, eksampol hemia tru long wok blong wasem ol trak o katem gras, we ol wok ia olgeta volontia nao oli mekem.

Olgeta stol long maket

Sel long olgeta guds we oli doneitem mo we i tekemples insaed long wan ritel stoa, ol guds olsem ol seken han klos mo ol narafala samting blong yusum long haos, oli eksempt long VAT, sipos wan non-profit bodi nao hemi stap ranem stoa ia.

Provaedem guds o sevis long wan smol fee

I gat plante jaritebol oganaeseisen oli stap provaedem ol guds o sevis long wan smol fi nomo. Long olgeta guds o sevis ia i gat ol samting olsem akomodeisen, kakai, toktok blong advaes mo plante narafala guds mo sevis bakegen we oli stap givimaot long ol ples we ol pipol oli go stap liv long hem long taem

blong emejensi, long olgeta refuji, misen, sup kitjin, mo samfala kaen “kaka long troli” mo plante narafala samting moa. Long olgeta keis olsem ia, fi we oganaeseisen hemi stap jasem i mas gat VAT insaed sipos oganaeseisen ia hemi rejista nomata sipos fi ia hemi no semak long maket valiu blong olgeta guds mo sevis ia we oli stap provaedem.

Olgeta fi we jyoj i jasem

Eni fi we wan jyoj hemi jasem long saed blong membasip blong mekem se jyoj ia hemi save provaedem olgeta sevis olsem maret, funeral, baptisim, raet blong yusum riding rum mo plante narafala sevis bakegen, bambae i mas gat VAT insaed sipos jyoj hemi rejista.

Eni samting we sponsa i givim

Bambae mifala i tekem se eni komesol sponsa long wan klab hemi olsem wan peimen blong ol guds o sevis (plante taem hemi blong advataesem wan samting) mo hemia i minim se i mas gat VAT long hem sipos klab we i risivim sponsa ia hemi rejista long saed blong VAT.

Olgeta inkam we i kamaot long investmen

Eni mane we oganaeseisen hemi winim long saed blong olgeta investmen hemi no peimen blong ol guds mo sevis - mekem se VAT hemi no aplae long ples ia.

Gavman

Long saed blong VAT, bambae yumi tekem se eni grant we Gavman hemi givim long wan oganaeseisen bambae hemi olsem peimen from sevis we oganaeseisen ia hemi provaedem long olgeta memba blong hem, long komuniti o long wan narafala grup we i gat semak intres. Hemia i mekem se plante grant bambae i mas gat VAT insaed mo eni oganaeseisen o bodi we hemi risivim grant ia

mo hemi rejista long saed blong VAT i mas pruvum 1/9 blong valiu blong olgeta grant ia i go long VAT Ofis. Hemia i minim se Gavman i mas inkrisim valiu blong olgeta grant ia sipos hemi wantem kipim valiu blong olgeta i stap semak oltaem.

Akomodeisen

Plante jaritebol oganaeseisen mo ol klab oli gat propeti blong olgeta we samtaem oli yusum blong rentemaot blong man hemi silip insaed. Eni mane we oli risivim long ol rent bambae i no gat VAT insaed. Be sipos mane ia we oganaeseisen o klab hemi winim from se hemi rentemaot propeti blong hem i go long wan narafala man o bodi blong hemi ranem wan bisnis insaed, bambae i mas gat VAT long mane blong rent ia, hemia olsem rent we oli kasem long wan stoa o ofis from hemi yusum propeti blong oganaeseisen o klab ia.

Olgeta rafol, bingo mo praes kompetisen

Olgeta rafol mo bingo i mas gat VAT insaed, sipos man we hemi oganaesem rafol o bingo ia hemi rejista. Be **net amaon blong mane we oli winim** nomo bambae i gat takis long hem. Hemia i minim se evri kash praes (we i no gat VAT long olgeta) oli mas didaktem long mane

we oli winim long ol tikit mo bambae i gat VAT long balens ia nomo.

Eksampol:

Wan oganaeseisen hemi salem 500 tikit long praes blong 100 VT long wan tikit blong wan rafol from wan kas praes blong 10,000 VT. Net amaon hemi total sel blong olgeta tikit taem yu didaktem ol kas praes long hem, olsem, 50,000 VT we yu didaktem long 10,000 VT. Bambae yu mas jasem VAT long balens we i stap (olsem 1/9 blong 40,000 VT).

Sipos olgeta praes ia hemi olgeta guds we narafala man i doneitem, bambae i mas gat VAT long total sel blong ol tikit. Sipos olgeta praes ia hemi ol guds we oganaeseisen o klab we i oganaesem rafol hemi bin pem, bambae i mas gat VAT long total sel blong ol tikit, be bambae oganaeseisen o klab i save kleim from wan takis kredit long VAT we hemi spendem blong olgeta pejes blong ol praes ia. I mas gat VAT long olgeta praes kompetisen mo gem blong skil o janis, hemia long taem we oli mekem dro o long taem we oli save risolt.

Anuol sabskripsen

Eni oganaeseisen we i stap jasem anuol sabskripsen long ol memba blong hem i mas putum VAT insaed long ol fi ia.

F Olgeta ekwipmen mo rikod

Olgeta kas rejista

Ol oganaeseisen ia oli mas gat wan kas rejista. Teip blong kas rejista i mas:

- rikodem eni mane we hem i risivim, mo;
- rikodem deit mo total blong evri mane we hemi risivim long wan dei;.

Ol oganaeseisen we oli rejista long saed blong VAT bae oli mas askem apruvol blong Darekta

blong Dipatmen blong Kastoms mo Inlan Reveniu sipos oli no wantem yusum kas rejista.

Olgeta rikod blong pruvum VAT

Long saed blong ol bisnis we oli rejista long saed blong VAT i gud se oli mas save gud ol rul blong takis ia mo fasin blong fulmap mo sendem ol riten. Bambae hemi no strong nating blong lanem ol niu samting ia.

Olgeta invoices

Bambae ol klab wetem ol narafala oganaeseisen oli **no** nidim eni spesel dokumen blong salem olgeta guds o sevis i go long ol memba blong jenerol pablik.

Be sipos wan oganaeseisen i salem wan samting long wan man we i rejista man ia hemi mas askem wan **Takis Invois** long hem. Ol oganaeseisen we i dil plante wetem ol man we oli rejista, oli mas kipim mo saplaem ol takis invois mo mas holem wan kopi blong ol takis invois we oli bin kivim.\

Wan Takis Invois hemi wan ligol dokumen we i soem VAT blong wan transaksen.

Long kaen keis olsem ia ol rul ia nao oli aplae:

- I no nid blong givim wan **Takis Invois** sipos amaon blong sel i no kasem 5,000 Vatu be yu mas soem wan pruf blong sel ia olsem wan risit.
- Sipos amaon blong sel i ova long 5,000 Vatu (VAT i stap insaed tu), Takis Invois i mas soem ol samting ia:

- toktok ia **Takis Invois** long wan klia ples
- wan serial namba blong invois
- nem, CT namba mo adres blong saplaea
- nem blong man we i risivim saplae ia
- deit
- kwantiti o volium blong ol guds o sevis
- wan smol storian abaot ol guds mo sevis we yu saplaem
- i save gat praes we i gat VAT insaed o wan steitmen se hemi kavremap wan fi blong takis; o total amaon blong takis, praes we i no gat VAT insaed mo praes we i gat VAT insaed.

Rimemba: Eniwan we i rejista i mas kipim oltaem olgeta takis invois we hemi kasem blong hemi save yusum blong sapotem kleim blong hem from VAT we hemi spendem long olgeta pejes mo ekspenses.

Ino nid blong sendem olgeta invois ia i kam long VAT Ofis wetem wanwan riten we yu stap sendem be yu mas kipim olgeta i stap long sef ples insaed long oganaeseisen blong yu mo redi blong soem long ol wokman blong VAT Ofis taem oli mekem wan inspeksen o sipos oli wantem mekem wok blong odit. Hemi impoten se yu mas kipim olgeta VAT rikod blong yu long wan period blong sikis yia o moa.

G Inkam Kategori Tebol

Wanem kaen inkam	Ol Eksempt saplae	Ol takisebol saplae
Olgeta sabskripsen		✓
Olgeta doneisen	✓	
Olgeta samting we oli pasem folem wan promis	✓	
Olgeta grant (olsem hemia we Gavman i stap givim)		✓
Sel blong olgeta guds we oganaeseisen i pem		✓
Sel blong olgeta guds we oli doneitem long oganaeseisen	✓	
Olgeta rafol (net amaon blong mane we oganaeseisen i winim)		✓
Olgeta mane blong rentem bigfala rum o ekwipmen		✓
Olgeta admisen fi		✓
Olgeta mane we oganaeseisen i winim long advetismen o sponsa		✓
Olgeta sel long ba		✓
Olgeta intres mo dividen	✓	
Olgeta mane we i kam long rent - komesol		✓
Olgeta mane we i kam long rent - residensol	✓	
Olgeta narafala inkam		✓
TOTOL TAKISEBOL SAPLAE		

YU NO WARI LONG OL EKSEMPT SAPLAE LONG KOLOM IA

Yu mas rejista long saed blong VAT sipos total ia i bitim 4 milian Vatu

Olsem wanem blong wokemaot valiu blong ol takisebol saplae

Eksampol

1. Wan jyoj i stap winim mane folem ol rod ia:

Olgeta doneisen	2,600,000 (doneisen)
Rentem bigfala rum	500,000 (takisebol)
Anuol festival	1200,000 (eksempt*)
Intres	50,000 (eksempt)
Total	VT 4,350,000

* Yumi tekem se olgeta guds we oli doneitem i kam long jyoj nomo mo ol guds we hemi salem. Olgeta takisebol saplae blong jyoj i kasem 500,000 Vatu nomo mo hemia i mekem se jyoj i no nid blong hemi rejista long saed blong VAT. Be sipos hemi wantem, hemi save disaed hemwan blong rejista.

2. Wan spots klab i stap winim mane folem ol rod ia:

Olgeta sabskripsen	600,000 (takisebol)
Sponsa	300,000 (takisebol)
Olgeta sel long ba	3,500,000 (takisebol)
Ol samting we i kam tru long wan promis	500,000 (doneisen)
Mane blong rafol	100,000 (takisebol)
Total	VT 5,000,000

Bambae spots klab ia i mas rejista long saed blong VAT from se total blong takisebol saplae blong hemi i bitim 4 milian Vatu.

Blong moa infomeisen o help

Sipos yu wantem kasem moa help long saed blong ranem olgeta administreisen wok blong VAT insaed long bisnis blong yu, yu save kontaktem VAT Ofis insaed long Dipatmen blong Kastoms mo Inlan Revenu. Bambae oli glad oltaem blong helpem yu.